

Patrick Capaul a «da cuminonza a Ruschein»

Per cletg eis el buca catschadur! Schiglioc fuss ei stau nuot cun in termin il secund gi da catscha. E tuttina va era el en in cert senn a catscha – a catscha da maletgs. *Patrick Capaul* ei redacur dil Cuntrasts e dil Telesguard tier RTR Radiotelevision Svizra Rumantscha. Ed el ei hosp dalla sera «da cuminonza» ussa dumengia, ils 3 da settember 2023.

Patrick Capaul (1972) ei carschius si a Ruschein. En siu vitg nativ eis el plitost darar. El ha fatg in emprendissadi sco dessignader d'electro. Mo sin quella professiun hagi el luvrau gnanc in soli gi pli suenter ch'el hagi giu terminau quella scolaziun. Persuenter ha el fatg schiglioc diltut puncto lavur sco giuvenot – e quei durent circa siat onns: El ha luvrau en ina bar, ei staus manischunz da taxi, vendider dad uorden da sport, ha luvrau a Turitg tier la dismessa da rumians, ei staus tier ina siguranza, ha fatg schlondas ed el ha era gudignau daners cun vender da sias fotografias da sport.

Igl onn 1999 eis el setschentaus tier RTR e leu lavura el aunc adina – ussa pia dapi 24 onns. Sto esser che quei ei ina lavur che plai ad

el ferg. A «da cuminonza a Ruschein – la sera dil treis» presenta el tschun cuorts schatgs da films ch'el ha realisau, raquenta danunder ch'el pren las ideas e tradescha forsa era tgei ch'ei captivont e tgei ch'ei stentus en sia lavur.

Mo era il tema «musica» duei buca vegnir alla cuorta quella sera. Patrick Capaul ei denter auter staus il ghitarist dalla band da rock «Nau» ed ha dau cun quella numerus concerts.

Pil mument fa el buca musica sin tribuna. Mo sunar ensemen cun collegas ei aunc adina in punct fix e regular en sia agenda.

Ils 3 da settember 2023 ei dil reminent la 35avla sera «da cuminonza a Ruschein». Sin il placat che *Andreas Joos* fa mintgamai stat ei scret quella gada: «Patrick Capaul, in um dalla televisiun, in um dalla musica e lu aunc in da Ruschein.» – Beinvegnidas ein sco adina era persuinas d'ordeifer. Suenter l'occurrenza vegn offeriu in sitg – aua ni vin. E l'entrada ei gratuita.

Maria Cadruvi

Ina sera cun Patrick Capaul. Dumengia, ils 3 da settember 2023 allas 20.15, Casa da scola Crestas, Ruschein. Dapli sin www.dacuminonza.ch.